

30  
ՀՈՒՆԻՍ  
2026

Luys  Lnyu®



ԱԶԳԱՅԻՆ ԺՈՂՈՎԻ ԸՆՏՐՈՒԹՅՈՒՆՆԵՐԻՆ  
ԵՎ ՀԱՆՐԱՔՎԵՐՆ ՄԱՍՆԱԿՑԵԼՈՒ ԻՐԱՎՈՒՆՔԸ  
ՍԱՀՄԱՆԱՓԱԿՈՂ ՆԱԽԱԳԾԵՐԻ ՓԱԹԵԹԻ  
ՍԱՀՄԱՆԱԴՐԱԿԱՆՈՒԹՅԱՆ ԿԵՐԱԲԵՐՅԱԼ

# ԱԶԳԱՅԻՆ ԺՈՂՈՎԻ ԸՆՏՐՈՒԹՅՈՒՆՆԵՐԻՆ ԵՎ ՀԱՆՐԱՔՎԵԻՆ ՄԱՍՆԱԿՑԵԼՈՒ ԻՐԱՎՈՒՆՔԸ ՍԱՀՄԱՆԱՓԱԿՈՂ ՆԱԽԱԳԾԵՐԻ ՓԱԹԵԹԻ ՍԱՀՄԱՆԱԴՐԱԿԱՆՈՒԹՅԱՆ ՎԵՐԱԲԵՐՅԱԼ



## ՆԵՐԱԾՈՒԹՅՈՒՆ

Ազգային ժողովի «Քաղաքացիական պայմանագիր» խմբակցության մի շարք պատգամավորների կողմից շրջանառության մեջ են դրվել «Հայաստանի Հանրապետության ընտրական օրենսգիրք» սահմանադրական օրենքում լրացումներ կատարելու մասին<sup>1</sup> և «Հանրաքվեի մասին» սահմանադրական օրենքում փոփոխություն կատարելու մասին նախագծերը<sup>2</sup> (այսուհետև՝ «Նախագծերի փաթեթ»):

Նախագծերի փաթեթով առաջարկվում է, որ Հայաստանի Հանրապետության Ազգային ժողովի ընտրություններին կամ հանրաքվեին մասնակցելու իրավունք ունենան միայն այն քաղաքացիները, որոնք վերջին 365 օրվա ընթացքում 183 և ավելի օր փաստացի գտնվել են Հայաստանի Հանրապետությունում:

Սույն վերլուծության նպատակն է գնահատել առաջարկվող կարգավորումների համապատասխանությունը Հայաստանի Հանրապետության Սահմանադրության 48-րդ հոդվածին, ինչպես նաև կիրառելի միջազգային չափանիշներին:

## 1. ՆԱԽԱԳԾԵՐԻ ՓԱԹԵԹՈՎ ԱՌԱՋԱՐԿՎՈՂ ԿԱՐԳԱՎՈՐՈՒՄՆԵՐԸ

Նախագծերի փաթեթով առաջարկվում է Հայաստանի Հանրապետության Ազգային ժողովի ընտրություններին և հանրաքվեներին մասնակցելու իրավունքի իրացման համար սահմանել լրացուցիչ պայման. այն է՝ քվեարկության կամ

<sup>1</sup> <http://www.parliament.am/drafts.php?sel=showdraft&DraftID=82271>

<sup>2</sup> <http://www.parliament.am/drafts.php?sel=showdraft&DraftID=82276>

հանրաքվեի օրվան նախորդող 48-րդ օրվա դրությամբ, իսկ Ազգային ժողովի արտահերթ ընտրությունների դեպքում՝ 28-րդ օրվա դրությամբ, դրան նախորդող 365 օրվա ընթացքում Հայաստանի Հանրապետությունում փաստացի 183 և ավելի օր գտնվելու պահանջը:

Նախագծերի փաթեթով նախատեսվում են սահմանափակ բացառություններ այն դեպքերի համար, երբ անձի բացակայությունը Հայաստանի Հանրապետությունից պայմանավորված է եղել հանրային ծառայության մեջ գտնվելու կամ արտերկրում բարձրագույն ուսումնական հաստատություններում ուսումնառության հանգամանքներով:

Նախագծերի փաթեթի ընդունման դեպքում հետևյալ անձինք կարող են զրկվել Ազգային ժողովի ընտրություններին կամ հանրաքվեին մասնակցելու հնարավորությունից.

- Հայաստանի Հանրապետության այն քաղաքացիները, որոնք մշտապես կամ ժամանակավորապես բնակվում են արտերկրում,
- Հայաստանի Հանրապետության այն քաղաքացիները, որոնք գտնվում են արտերկրում աշխատանքի, ընտանեկան, առողջական, գործարար գործունեության կամ անձնական այլ պատճառներով:

Այսպիսով, Նախագծերի փաթեթով Սահմանադրության 48-րդ հոդվածով նախատեսված երկու պայմաններին՝ քաղաքացիություն և 18 տարեկանը լրացած լինելը, ավելացվում է երրորդ պայմանը՝ Հայաստանի Հանրապետությունում փաստացի գտնվելու պահանջը:

## 2. ՍԱՀՄԱՆԱԴՐՈՒԹՅԱՆ 48-ՐԴ ՀՈԴՎԱԾԻ 1-ԻՆ ՄԱՍԻ ԲՈՎԱՆԴԱԿՈՒԹՅՈՒՆԸ

Հայաստանի Հանրապետության Սահմանադրության 48-րդ հոդվածի 1-ին մասը սահմանում է.

*«Ազգային ժողովի ընտրության կամ հանրաքվեի օրը տասնութ տարին լրացած Հայաստանի Հանրապետության քաղաքացիներն ունեն ընտրելու և հանրաքվեին մասնակցելու իրավունք»:*

Այս դրույթը ընտրելու և հանրաքվեին մասնակցելու իրավունքի իրականացման համար նախատեսում է երկու և միայն երկու պայման.

- անձը պետք է լինի Հայաստանի Հանրապետության քաղաքացի,

- Ազգային ժողովի ընտրության կամ հանրաքվեի օրը պետք է լրացած լինի անձի տասնութ տարին:

Սահմանադրության 48-րդ հոդվածի 1-ին մասը չի պարունակում ո՛չ բնակության, ո՛չ հաշվառման, ո՛չ էլ Հայաստանի Հանրապետությունում փաստացի գտնվելու որևէ պահանջ:

Հետևաբար Սահմանադրությունն Ազգային ժողովի ընտրություններին և հանրաքվեներին մասնակցելու իրավունքը կապում է բացառապես քաղաքացիության և տարիքի հետ:

### 3. ՆԱԽԱԳԾԵՐԻ ՓԱԹԵԹԻ ԱՆՀԱՄԱՊԱՏԱՍԽԱՆՈՒԹՅՈՒՆԸ ՍԱՀՄԱՆԱԴՐՈՒԹՅԱՆ 48-ՐԴ ՀՈԴՎԱԾԻ 1-ԻՆ ՄԱՍԻՆ

Օրենսդրական փաթեթը սահմանադրականության տեսանկյունից խնդրահարույց է մի քանի ինքնուրույն հիմքերով:

#### Ա. Սահմանադրությամբ չնախատեսված լրացուցիչ պայմանի սահմանում

Սահմանադրության 48-րդ հոդվածի 1-ին մասը սահմանում է ընտրական իրավունքի իրականացման պայմանները: Օրենսդրական փաթեթը նախատեսում է նոր պայման, որը Սահմանադրությամբ նախատեսված չէ:

Եթե սահմանադիրն ունեցած լիներ ընտրելու իրավունքը Հայաստանի Հանրապետությունում գտնվելու որոշակի ժամկետի հետ կապելու մտադրություն, ապա այդպիսի պահանջը կներառեր Սահմանադրության տեքստում, ինչպես դա արել է նույն հոդվածի այլ մասերում:

#### Բ. 48-րդ հոդվածի 1-ին և 2-րդ մասերի կառուցվածքային հակադրությունը

Սահմանադրության 48-րդ հոդվածի 2-րդ մասը, որը կարգավորում է Ազգային ժողովի պատգամավոր ընտրվելու իրավունքը, ուղղակիորեն նախատեսում է, որ թեկնածուն ընտրությանը նախորդող վերջին չորս տարիներին պետք է մշտապես բնակված լինի Հայաստանի Հանրապետությունում:

Այն փաստը, որ սահմանադիրը 48-րդ հոդվածի 2-րդ մասում օգտագործել է բնակության պահանջը, բայց այն բաց է թողել նույն հոդվածի 1-ին մասից,

պատահական չէ: Բնակության պահանջի գիտակցված ներառումը 48-րդ հոդվածի 2-րդ մասում և դրա բացակայությունը 48-րդ հոդվածի 1-ին մասում վկայում են, որ սահմանադիրը նման պահանջ նախատեսել է միայն պասիվ, բայց ոչ ակտիվ ընտրական իրավունքի համար: Ուստի սահմանադրի այս միտումնավոր ընտրությունը սովորական օրենսդիրը չի կարող չեղարկել:

Այսպիսով, Սահմանադրության 48-րդ հոդվածի համակարգային մեկնաբանությունից հետևում է, որ օրենքով չի կարող սահմանվել ընտրելու և հանրաքվեին մասնակցելու իրավունքը սահմանափակող այնպիսի լրացուցիչ պայման, որը Սահմանադրությամբ նախատեսված չէ:

#### **Գ. Սահմանադրության 48-րդ և 181-րդ հոդվածների կարգավորման տարբեր մոդելները**

Սահմանադրության կառուցվածքը ևս հաստատում է, որ Ազգային ժողովի ընտրություններին և հանրաքվեներին մասնակցելու իրավունքի պայմանները սահմանադիրը նախատեսել է սպառիչ կերպով:

Ի հակադրություն Սահմանադրության 48-րդ հոդվածի 1-ին մասի, որն անմիջականորեն սահմանում է Ազգային ժողովի ընտրություններին և հանրաքվեներին մասնակցելու իրավունքի սուբյեկտներին և դրա իրականացման պայմանները, Սահմանադրության 181-րդ հոդվածի 2-րդ մասը տեղական ինքնակառավարման մարմինների ընտրությունների կազմակերպման և անցկացման կարգավորումը վերապահում է Ընտրական օրենսգրքին՝ առանց ընտրական իրավունքի պայմանների սահմանադրական թվարկման:

Այս տարբերությունը վկայում է, որ սահմանադիրը կիրառել է կարգավորման տարբեր մոտեցումներ: Համապետական ընտրությունների և հանրաքվեների դեպքում Սահմանադրությունն ինքն է սահմանել ընտրական իրավունքի իրականացման պայմանները, մինչդեռ տեղական ինքնակառավարման մարմինների ընտրությունների դեպքում կարգավորման զգալի շրջանակ վերապահել է օրենսդրին:

Հետևաբար Սահմանադրության 48-րդ հոդվածի 1-ին մասի կարգավորման առարկայի շրջանակում օրենսդրին չի վերապահվել որևէ մնացորդային հայեցողություն՝ ընտրելու կամ հանրաքվեին մասնակցելու իրավունքի համար լրացուցիչ նյութական պայմաններ սահմանելու նպատակով: Նախագծերի փաթեթը, սակայն, հենց դա է անում՝ առանց 181-րդ հոդվածի 2-րդ մասի նման սահմանադրական վերապահման, ավելացնում է նոր նյութական նախապայման

այն իրավունքին, որի պայմանները սահմանադիրն արդեն իսկ սպառիչ կերպով ամրագրել է Սահմանադրության տեքստում: Օրենքով չի կարող վերաձևակերպվել կամ լրացվել Սահմանադրությամբ արդեն իսկ սպառիչ կերպով սահմանված ընտրական իրավունքի սուբյեկտային կազմը:

### **Դ. 48-րդ հոդվածի 4-րդ մասի սպառիչ բնույթը**

Սահմանադրության 48-րդ հոդվածի 4-րդ մասը սահմանում է այն սպառիչ ցանկը, երբ անձը չի կարող ընտրել, ընտրվել կամ մասնակցել հանրաքվեին:

Այդպիսիք են՝

- դատարանի օրինական ուժի մեջ մտած վճռով անգործունակ ճանաչված անձինք,
- դիտավորությամբ կատարված ծանր հանցանքի համար դատապարտված և պատիժ կրող անձինք:

Հայաստանի Հանրապետությունում չգտնվելը կամ երկրից բացակայելն այդ ցանկում ներառված չէ:

48-րդ հոդվածի համակարգային մեկնաբանությունը հանգեցնում է այն եզրակացությանը, որ ընտրելու իրավունքի որևէ լրացուցիչ սահմանափակում կարող է սահմանվել միայն այն դեպքում, երբ դրա համար ուղղակի սահմանադրական հիմք գոյություն ունի:

## **4. ՆԱԽԱԳԾԵՐԻ ՓԱԹԵԹԻ ԱՆՀԱՄԱՊԱՏԱՍԽԱՆՈՒԹՅՈՒՆԸ ՍԱՀՄԱՆԱԴՐՈՒԹՅԱՆ 75-ՐԴ ԵՎ 80-ՐԴ ՀՈԴՎԱԾՆԵՐԻՆ**

Սահմանադրության 75-րդ հոդվածի համաձայն, հիմնարար իրավունքները և ազատությունները կարգավորելիս, օրենքները պետք է սահմանեն այդ իրավունքների և ազատությունների արդյունավետ իրականացման համար անհրաժեշտ կազմակերպական կառուցակարգեր և ընթացակարգեր:

Միաժամանակ, Սահմանադրության 80-րդ հոդվածը սահմանում է, որ հիմնարար իրավունքների և ազատությունների վերաբերյալ դրույթների էությունն անխախտելի է:

Այս սահմանադրական դրույթների համատեղ մեկնաբանությունից հետևում է, որ օրենսդիրը, հիմնարար իրավունքը կարգավորելիս, իրավասու է սահմանելու

դրա արդյունավետ իրականացման համար անհրաժեշտ ընթացակարգային և կազմակերպական կանոններ, սակայն իրավասու չէ վերաձևակերպելու կամ նեղացնելու Սահմանադրությամբ սահմանված իրավունքի սուբյեկտային կազմը կամ բովանդակությունը:

Մինչդեռ Նախագծերի փաթեթը չի սահմանում ընտրական իրավունքի արդյունավետ իրականացման նոր կազմակերպական կամ ընթացակարգային մեխանիզմներ: Ընդհակառակը, այն ընտրելու և հանրաքվեին մասնակցելու սահմանադրական իրավունքը պայմանավորում է նոր նյութական նախապայմանով, որը նախատեսված չէ Սահմանադրության 48-րդ հոդվածով:

Այսպիսով, Նախագծերի փաթեթը դուրս է գալիս Սահմանադրության 75-րդ հոդվածով օրենսդրին վերապահված կարգավորման շրջանակներից և միջամտում է Սահմանադրությամբ անմիջականորեն սահմանված ընտրական իրավունքի բովանդակությանը: Արդյունքում, սահմանադրական կարգավորման մակարդակում երաշխավորված ընտրական իրավունքը վերափոխվում է սովորական օրենքի: Սա անհամատեղելի է Սահմանադրության 80-րդ հոդվածով ամրագրված՝ հիմնարար իրավունքների էության անխախտելիության սկզբունքի հետ:

## 5. ՆԱԽԱԳԾԵՐԻ ՓԱԹԵԹԸ ՎԵՆԵՏԻԿԻ ՀԱՆՁՆԱԺՈՂՈՎԻ ՉԱՓԱՆԻՇՆԵՐԻ ՀԱՄԱՏԵՔՍՈՒՄ

Միջազգային փորձը ևս վկայում է, որ քաղաքացիների՝ համապետական ընտրություններին մասնակցելու իրավունքը չի կարող սահմանափակվել ընտրություններից առաջ որոշակի ժամկետով երկրում գտնվելու հանգամանքով:

Վենետիկի հանձնաժողովի «Ընտրական հարցերում բարենպաստ գործունեության կանոնագիրքը»<sup>3</sup> սահմանում է, որ ընտրություններին մասնակցելու համար տևողության պահանջը կարող է կիրառվել միայն տեղական կամ համայնքային ընտրությունների դեպքում:

Նշված չափանիշը կարևոր է, քանի որ Նախագծերի փաթեթը վերաբերում է ոչ թե տեղական կամ համայնքային, այլ Ազգային ժողովի, այսինքն՝ համապետական ընտրություններին:

<sup>3</sup> [https://docs-venice.coe.int/files/Code%20de%20conduite\\_GBR%202025\\_WEB\\_A5.pdf](https://docs-venice.coe.int/files/Code%20de%20conduite_GBR%202025_WEB_A5.pdf) Part I, 1.1.c

Վենետիկի հանձնաժողովի «Հանրաքվեների վերաբերյալ բարենպաստ գործունեության վերանայված կանոնագիրքը»<sup>4</sup> նույն տրամաբանությունն է կիրառում նաև հանրաքվեների համար՝ նշելով, որ քաղաքացիների համար բնակության տևողության պահանջը կարող է սահմանվել միայն տեղական կամ համայնքային հանրաքվեների դեպքում, իսկ արտերկրում բնակվող քաղաքացիների հանրաքվեին մասնակցելու պայմանները չպետք է լինեն ավելի ծանր, քան ընտրությունների դեպքում:

Այսպիսով, Նախագծերի փաթեթը խնդրահարույց է ոչ միայն ՀՀ Սահմանադրության, այլև միջազգային փորձի տեսանկյունից:

## 6. ԵՐԱՎԱՑՈՒԹՅՈՒՆ

Նախագծերի փաթեթով առաջարկվող կարգավորումը, որով Հայաստանի Հանրապետության քաղաքացիների՝ Ազգային ժողովի ընտրություններին և հանրաքվեներին մասնակցելու իրավունքը պայմանավորվում է նախորդ 365 օրվա ընթացքում առնվազն 183 օր Հայաստանի Հանրապետությունում փաստացի գտնվելու հանգամանքով, հակասում է Հայաստանի Հանրապետության Սահմանադրության 48-րդ հոդվածի 1-ին մասին:

Այս եզրակացությունը հիմնվում է երեք փոխլրացնող փաստարկների վրա.

- Սահմանադրության 48-րդ հոդվածի 1-ին մասը սահմանում է ընտրական իրավունքի իրականացման պայմանների սպառիչ ցանկ՝ քաղաքացիություն և տասնութ տարին լրացած լինելը, և օրենսդրին չի վերապահում լրացուցիչ պայմաններ սահմանելու իրավասություն,
- 48-րդ հոդվածի 1-ին և 2-րդ մասերի կառուցվածքային համեմատությունը ցույց է տալիս, որ այն դեպքերում, երբ սահմանադիրը ցանկացել է նախատեսել բնակության պահանջ, դա արել է հստակ և ուղղակի ձևով,
- 48-րդ հոդվածի 4-րդ մասը սահմանում է ընտրական իրավունքից զրկելու հիմքերի սպառիչ ցանկ, որում Հայաստանի Հանրապետությունում չգտնվելը ներառված չէ:

Նշված անհամապատասխանությունը հաստատվում է նաև Սահմանադրության 75-րդ և 80-րդ հոդվածներով. օրենսդիրն իրավասու է սահմանելու հիմնարար իրավունքների արդյունավետ իրականացման կազմակերպական և ընթացակարգային մեխանիզմներ, սակայն իրավասու չէ

<sup>4</sup> Venice Commission, **Revised Code of Good Practice on Referendums**, CDL-AD(2022)015, Part I, 1.1.c

վերասահմանելու Սահմանադրությամբ ամրագրված իրավունքի սուբյեկտային կազմը կամ խաթարելու դրա էությունը:

Վենետիկի հանձնաժողովի չափանիշները ևս հաստատում են, որ բնակության կամ փաստացի գտնվելու նման պահանջները միջազգային ընտրական իրավունքի տեսանկյունից թույլատրելի են միայն տեղական ընտրությունների և տեղական հանրաքվեների դեպքում և ոչ թե համապետական գործընթացների համար:

Այսպիսով, Սահմանադրությամբ բոլոր չափահաս քաղաքացիներին երաշխավորված ընտրելու և հանրաքվեին մասնակցելու հիմնական իրավունքը Նախագծերի փաթեթով սահմանափակվում է առանց սահմանադրական լիազորության: Հետևաբար, Նախագծերի փաթեթը չի համապատասխանում Հայաստանի Հանրապետության Սահմանադրությանը:

---

**«ԼՈՒՅՍ հիմնադրամ» գրառմամբ հրապարակված նյութը պաշտպանված է ՀՀ օրենսդրությամբ և միջազգային համաձայնագրերով: Հրապարակված նյութի բոլոր իրավունքների բացառիկ իրավատերը «ԼՈՒՅՍ» հիմնադրամն է:**

**Նյութի ամբողջական կամ դրանից քաղվածքների վերարտադրումը թույլատրվում է իրականացնել միայն «ԼՈՒՅՍ հիմնադրամ» գրառման և համապատասխան *ակտիվ հղման* տեղադրման պայմանով՝ պահպանելով «ԼՈՒՅՍ» հիմնադրամին պատկանող նյութերի օգտագործման կարգը:**